



Selasa, 08 Nopember 2022

Ogen : Daniel 7:1-8



Pengenehenen Daniel



Kenca raja Nebukadneser mate, maka ia igantiken raja Belsasar. I bas pemerintahen raja Belsasar enda me Daniel ndatken pengenehenen. I bas nipina, Daniel ngidah angin rembus piahna lau lawit si mbelang pe mesangat pe ngembusna. Si enda ncidahkensa maka doni bengket ku bas sada kekacauan si mesangat. Emaka lit empat rubia-rubia si mulgap i bas lawit nari alu tempas si pelain-lain. Kerinana mejin ras man kebiarenken. Empat rubia-rubia e me simbol kinirajan si pegancihen ngkuasai doni enda. Rubia si pemena nggambarkan kerna kinirajan Babil, sipeduaken e me kinirajan Media, si petelukan kerna kinirajan Persia ras rubia si peempatkan kerna kinirajan Romawi. Tapi i bas sie kerina maka iidah Daniel maka lit sada tahta si ikunduli si enggo nggeluh rasa lalap e me Dibata. Maka kerina tahta si empat e jadi sikerajangenNa. Kerina rubia-rubia (kinirajan) e ibuat kuasana janah rubia si peempatkan ibunuhNa. I bas pengenehenen Daniel teridah kerehen Anak Manusia nusur tare embun janah kerina kuasa ibereken Dibata man bana ras kuasaNa rasa lalap ras kinirajanNa pe la ermasap-masap. Lit si nggo terjadi, lit denga lang sabap waktuna labo terprediksi. Pegenehenen Daniel enda nggo terbukti i bas kinatana, maka peganci-gancih kinirajan ngkuasai doni enda seh kerehen kinirajan Dibata si ibaba Jesus. Emaka gundari kita selaku kalak si tek man Kristus, nggeluh i bas pengenehenen Daniel si iterusken pengenehenen Johanes i bas kitab Ketangkasen e me si terutama Maranata (pedas kam reh o Tuhan kami), kerehen Jesus si peduakaliken. Pengenehenen labo bali ras tafsir mimpi sebab labo lit kuasa ras pemeteh i bas manusia guna ngantusisa seakatan Dibata ngenca si mereken kepentaren guna ngantusisa janah labo ise pe meteh wari kejadiin si nandangi reh e aminna pe nggo idat antusenna. Doni enda lalap nge erdalan ku bas perubahren ras kehancuren tapi Dibata labo mobah. Kalak si ernalem man Dibata ndatken kegeluhen si rasa lalap.